

SCRIPTA

Numéro Scripta : 1321

Auteur(s) : Bayeux (vicomte)

Bénéficiaire(s) : Bayeux (chapitre cathédral)

Genre d'acte : charte

Authenticité : non suspect

Datation : 1284, 28 août

Lieu d'émission : Bayeux

Action juridique : autre

Langue du texte : ancien français

Analyse

Denise, femme de Henri de Magny, jure devant le vicomte de Bayeux qu'elle ne fera valoir aucun droit contre la vente effectuée par son mari au chapitre de Bayeux d'une rente sur un masuage tenu par hommage à Saint-Loup.

Tableau de la tradition

Éditions principales

a. Bourrienne Valentin (Abbé), *Antiquus cartularius ecclesiae Baiocensis (Livre noir)*, Rouen-Paris, Lestringant-Picard (Société de l'histoire de Normandie), 1902-1903, 2 vol., n° DXLVIII, t. 2, p. 301-302.

Texte établi d'après a

A touz cels qui ces lettres verront le visconte de Baiex, saluz. Saechiez que Dyenise, feme Henri de Maigny, de la parroisse de Gueron, establee par devant me, le dit Henri, son mari, present, donnant li auctorité de jurer, jura par devant mei, sus les saintes evvangeies, et pramist par sa fey, o l'auctorité de son mari, et de sa bone volenté, que ele ne demandera douaere ne autre chose, et que ele riens ne réclamera desorénavant en vint et deuls souz de Torneis et un chapon d'anel rente, qui sunt pris d'an en an, par la main de Johan Yvon, oveques son hommaige, à Noel unze solz et un chapon, et à la feste de la Nativité saint Johan Baptiste unze solz, en un herbergaee assis en la parroisse de Saint Lou de Baiex, joust le masuaige as hers Michiel Sebrien, d'une partie, et le masuaige Johan Beitercervise, par la reson de Thomasse, sa femme, de l'autre ; por cen que le dit Henri, son mari, les a venduz, à fin et à héritaige, par le consentement de lie et par la volenté, au chapitre de l'iglise Nostre Dame de Baiex por quatorze livres de Torneis que il a eu du dit chapitre, de quiex il se tient bien por païé : à tenir, à avoir, à posseer à fin et à héritaige le dit anuel rente au dit chapitre et à lor successors, et à cels qui auront cause du dit chapitre, et tout le dreit, la justice et la seignorie que le dit Henri aveit, et povet, et deveit aver el dit herbergaee, sanz contredit, sanz réclaim et sanz empeechement de la dite Dyonise et de ses hers. Et la dite Dyonise, o l'auctorité de son mari et de sa bone volenté, jura par devant mei à cen tenir ferm et estable à touz jors ; et renonça por lie et por ses hers à tout le dreit que ele aveit, et povet, et deveit avoir el dit anuel rente, et el dit herbergaee, sanz réclamance fere. Et en tesmoig de cen, ceste letre est seelée du seel de la visconté de Baiex, à la requeste des parties, sauve la dreiture le Rei et autrui, oveques le seel de la dite Dyonise. Ce fu fet en l'an de grâce mil ijc quatre vinz et quatre, le lundi devant la feste de la décollation saint Johan.